

D U L C I U M

NATURA, USU ET ABUSU,

Quam,

CONSENSU ET AUTORITATE
Illustris ac Gratosissima Facultatis
Medicæ in Almâ Salanâ,

P R Æ S I D E

GEORGIO WOLFF-
GANGO WEDELIO,

Med. Doctore, Sacri Palatii Cæs. Comite,
Consiliario & Archiatro Ducali Saxonico, Theoretices
Professore Ordinario,

*Patrono, Præceptore ac Hospite
submissè devenerando,*

PRO LICENTIA

Summos in Arte Medicâ Honores, Insignia atque Privi-
legia Doctoralia, MORE MAJORUM, solenniter &
legitimè consequendi,

publicæ Philiatrorum Disquisitioni tradit


JOHANNES CHRISTIANUS CLAUDERUS,
ALTENBURGENSIS,

Ad diem Maji Anni M DC XCIV.

In Auditorio Majori,

Horis ante- & pomeridianis consuetis.

JENÆ, LITERIS KREBSIANIS.



PRÆFAMEN.



Um sensus, elogio *Tullii*, sint nuncii ac interpretes rerum, ducunt nos quilibet suo loco in cognitionem earundem, idque non solum, quæ corpori sunt congrua, nutribilia, salubria objecta, vel minus talia, verum quoque ulterius.

Inter hos gustatus, *eiusdem* asserto, sensus ex omnibus maximè voluptarius, quique dulcitudine præter cæteros commovetur, dum sapes discernit, reliquis contrà id facit, quod sceneret corpori sapida, & insumat in usum substantificum.

Hinc sanè disquiri merentur non acida, non amara solum, aliaque, sed inprimis quoque DULCIA, tantoque magis, quod alliciant ad se, quod in centro gerant intimius velut occlusam agendi rationem, & quotidiani sint quoque usus.

Neque hoc de nihilo est, sed quo difficilius patent, quo abstrusior est hæc scientia, eo maiorem sibi vendicat nobilitatem ac usum. Neque terreri debemus à summis viris motis difficultatibus. Fatetur *Sylvius l. 1. Prax. c. 44. p. m. 299.* se saporum veras causas ac rationes accuratas exactè assignare hætenus non potuisse. At ipse accuratam de saporibus tractationem inter desiderata refert meritò,

Imò ipse *Galenus* l. 1. de *simpl. med. Fac. c. 24.* à phisicis problematibus recedendum esse ait, quæ innume-
ris dubitationibus sint intricata, quod circa scrutinium
hoc acoris, dulcedinis, amaroris & aliarum qualitatum
hæitationes tum plurimæ, tum maximæ existere sole-
ant. Has non secus vitandas censeret, quàm quædam præ-
cipitia. Et hæc verò mitius possumus interpretari.

Quamobrem in præsentiarum, loco speciminis
Inauguralis, in DULCIUM NATURAM, UsUM atque ABU-
sum pro viribus inquirere consultum judicavimus. Hoc
ut feliciter succedat, Divini Numinis Auxilium implo-
ramus.

CAPUT I.

De

DULCIUM NATURA.

ANalyfin dulcium tractantibus NOMINIS quoque
ratio non omnino negligenda videtur. Dulce
igitur à delicio derivari Philologis visum est, quod
dulcia maximè alliciant ac delectent, quo de *Pe-
rotius*, & alii legi possunt. Græcè γλυκὺ audit, à quo ipso
nonnulli arcessere volunt dulcis originationem.

Dicitur verò propriè dulce in genere de omni ma-
teriâ suavem saporem præ se ferente, seu quod gustu sua-
ve est, acceptum ac jucundum, adeoque κατ' ἀγιν oppo-
nitur acido, amaro, austero, & similibus. In specie, &
velut κατ' ἐξοχήν, γλυκὺ significat vinum passum, ceu dul-
ce, quo nomine apud *Hippocratem* l. 2. de *Morb. Mulier. c. 88.*
r. 1. occurrit, ut & apud *Philosophum*, aliosque. Ex La-
tinis eodem sensu dulce sine adiectione legitur apud *Pli-*

nium

nium l. 27. H. N. c. 26. Cum adjectione frequentius hoc nomen audias, uti dulcem radicem vocant glycyrrhizam; vid. *Dioscorid.* l. 3. c. 7. ut alia non laudemus. καὶ ἀντι-
Φρασιν verò τὰ γλυκύσα fella dicuntur, quasi minimè talia, quod apud *Cael. Aurelianum* l. 3. c. 1. de morb. chronic. & *Pliniam* l. 27. c. 10. fel dulce ex adverso appellatum legitur.

Impropriè & latiori sensu de singulis suavibus gratisque rebus profertur, seu animo, seu corpori, vel cuivis alteri sensui adferant voluptatem. Ita dulcem nominamus amicum, conjugem, vocem, sermonem, odorem, oscula dulcia, dulce vivere, canere, dulcedinem scribendi, voluptatis, aliaque. Imò ab Anatomicis, v. g. *Columbo* clitoris dicta fuit dulcedo amoris, vid. *Bartholin.* l. 1. *Anat.* c. 34. A chemicis in usum vocatur dulcedo Saturni, de quâ vid. *Libavius Syntagm. Arcan. Chim.* l. 7. c. 36. Seorsim quoque mel innumeris exemplis apud Autores ponitur simili acceptione, ut mellea verba v. g. notent orationis elegantiam & suavitatem.

Sed missis his pergimus dulcium intimiora perlustrare, ubi consultum erit prius distinctiones seu differentias eorundem præmittere. Enimverò ut latius patent, ita commodè statui possunt & dici (1) alia *privativè*, alia *positivè* talia. Per illa intelliguntur ἀποια, sensu medico, i. e. nullâ sensibili & eminente qualitate gaudentia, *insipida*, testimonio absentia salium. Sic aqua simplex dicitur dulcis, & imprimis mercurius dulcis, i. e. non corrosivus, non acris, ut sublimatus vulgaris, καὶ ἐξοχὴν ita dictus, sed mitigatus. Sanguis item dulcis appellatur respectivè, ut alia dicta, quod corpori nutriendo & sanitati aptus sit; dulcis respectu cholerici aut salini, ad hæcticam hinc, tabem, aliosque morbos disponentis.

Contradictionem quidem in se habere videri posset primâ fronte, insipidum quid esse, & tamen dulce; ast partim loquendi usus in medicorum scholis receptus consentit, partim affinitas afficiendi id persuadet, quod insi-

pidum licet dulce non sit actu, nullam tamen linguæ inferat molestiam, sed saporem exiguum, blandum, ad dulcedinem inclinantem, nec ingratum. Est hæc divisio ipsius Divini Senis l. de aliment. c. 5. t. 13. γλυκὺν, ἢ γλυκὺν γλυκὺν ἐς δύναμιν, οἷον ὕδωρ γλυκὺν ἐς γεῦσιν, οἷον μέλι. Dulce non dulce: dulce ad potentiam, velut aqua: dulce ad gustum, velut mel.

Hæc ergo seu positivè talia sunt, quæ sensu gustus percipiuntur dulcia, suntque iterum (2) vel mediocriter talia, quorum dulcedo temperata est copioso humido, nullâ qualitate peregrinâ excedente conjunctâ, & temperatè calida, maximèque nutritibilia; vel *eminenter talia*, quæ siccitate sive minore humiditate pollent, & magis calida; quò dulcius enim quid est, eò quoque ferè est calidius. Eodem res redit, si distinguamus eadem quoad gradus. Ita primi gradus dici possunt aquosa magis, ut aqua simplex: secundi aquea oleosa, ut lac, vinum, carnes, juscula, aliaque: tertii propriè, πρώτως & absolutè sic dicta, dulcedinem actu exhibentia, ut mel, saccharum, & reliqua *eminenter talia*, variè quippe intendi & remitti queunt, unde & mansiones quasdam concipere licet.

(3) Dulcia alia sunt petita ex *regno vegetabili*, quorum potiora sunt glycyrrhiza, seu radix dulcis, semen anisi, amygdala dulcia, caricæ, ficus, passulæ, pistacia, manna, saccharum, &c. Alia ex *regno animali*, ut butyrum, lac, mel, carnes, &c. Alia ex *regno minerali*, ut vitriolum, saccharum Saturni, mercurius dulcis, licet hic saltem privativè sit talis, per dicta.

(4) Alia sunt *nativa*, alia *producta* dulcia. Illa, quæ statim sua, & ope naturæ dulcescunt, qualè exempli loco ponamus saccharum; hæc, quæ arte confecta atque inde resultantia sunt, ut saccharum Saturni. Reliqua enim, v. g. sirupi, potiones, julepi, condita, confectiões, conservæ, aliaque præparata dulcia non tam arte enata sunt, ut talia, quàm variata.

(5) Alia

(5) Alia sunt *simplicia*, quæ nullam aliam qualitatem habent commixtam, sibi relicta; alia *composita*, ex aliorum saporum admixtione, seu naturâ, seu arte combinata. Hæcque iterum variant, in melle v. g. conjuncta est acrimonia, in pyris quibusdam acerbum, in cerasis & prunis nonnullis aciditas; in vinis his, illis austerum: in aliis amaritudo. Hinc & nomina varia enata sunt, ad hoc exprimendum; audiunt enim *γλυκύπινα*, *dulcamara*, *ὀξύπινα*, *dulcacida*, & sic porro.

(6) Alia dicuntur à *consistentiâ* diversâ vel *secca*, solida & concreta, ut saccharum, manna; vel *liquida*, ut vina, mulsa; vel *media* & spissa, ut mel & alia.

Denique (7) dulcia sunt vel *alimentosa*, vel *medicamentosa*. Istud præstant temperata, non excedente qualitate activâ prædita, substantificè assimilari & nutrire apta; hæc, ubi alterandum magis, quando natura non est amplius sui juris, sed remediis etiam hisce pro re natâ opus habet, magis activa.

Tacemus (8) dulcia esse quoque *morbosa* & *venenosa*, non solum extra corpus assumpta, sed & in eodem, si talem *διάκρισιν* patiantur humores, argumento *Coil. de Vet. Medic. c. 24. t. 23. seq.*

Ptæmissis itaque hisce ut dulcium natura hæc eò melius pateat, commodum erit, concinnam tradere DEFINITIONEM, quæ sequens esse potest: *Dulce est qualitas mixtorum activa, alimentosa imprimis & medicamentosa, laxans ac demulcens, ab acido cum sulphure æquabiliter remixto.*

GENUS constituit qualitas, & quidem è substratâ materiâ sapore figillata & definita; natura enim saporum est, ut sint qualitates certo modo gustum afficientes. Qualitas est mixtorum, ipsa enim elementa, è quibus mixta componuntur, nullo sapore, adeoque nec dulci gaudent; & quidem mixtorum ut sic, quod satis testatur sensus & experientia. Qualitas est activa, ab afficiendi modo, seu effectu, & principiis activis, quæ illam exerunt, dicta. Qua-
litas

litas alimentosa, quod in iis plurimum est γλιρᾶς, non pura tamen, sed ob activitatem illam alterantem & medicamentosa est, quod ex sequentibus melius patebit. DIFFERENTIAM SPECIFICAM reliqua Definitionis verba exhibent, desumpta à sensus & particularū illum exerentium modulo.

Originem igitur dulcium perlustraturos sensus ipsos consulere juvat, quomodo in istos incurrant. Et quidem sensu benè habente patet, examinata dulcia, si degustentur, linguæ maximè abblandiri, quatenus poros atque tubulos ejusdem laxant ac demulcent, non verò constringunt & pungunt, ut acida, nec laxant & stringunt, ut amara; atque ideò palato valdè grata, naturæque amica esse, alia tamen magis, alia minùs, prout gradus eorum differunt, & ἰδιοσυγκρασία subjectorum. Notum enim est, huic aliquid dulce videri, alteri verò amarum vel ingratum saltem, si non sapore, tamen effectū, & contrà.

Sin sensus alios quoque advocemus in subsidium examinis, dulcia rarò odorata deprehendi observavit jam Plinius l. 21. H. N. c. 17. & ante illum Theophrastus l. 6. de Caus. Plant. c. 22. Addit rationem succinctam: ἄτιον δὲ, ὅτι παχύτερ & καὶ γεωδέστερ ὁ γλυκὺς χυλὸς. Ratio verò est, quod succus dulcis crassior atque terrestris est; id quod optimè principiis nostris, seu naturæ potius, quadrat & conforme est. Est enim & fixior sic dulcedinis natura, ob acidum, & pori magis obliti, quò minus exhalatio fieri queat.

Hinc & tactui æquabilia magis obveniunt, quamvis actuata & soluta hinc intimiùs salinas abstersivas vires aliasque latentes prius exerant quoque satis. Prout enim textura & compages & particularum aliarum miscela variat, ita quoque effectus inde consequitur non unus. Sic alia refrigerant, ut lac: alia calefaciunt, ut mel: alia humectant, ut vinum, passulæ: alia ficcant, ut saccharum: alia temperant, ut glycyrrhiza, & sic porrò.

Ab hoc ergò sensuum testimonio disquisitum non uno modo fuit, quomodo dulcium hæc activitas & essentia

tia definiri, seu causa qualitatis hujus genuina reddi & ex-
primi valeat. Fas erit, hanc in rem audire autores diver-
simodè philosophantes. Sapientissimus *Democritus* particu-
larum figuram assignavit, eâque contentus fuit, quando
χυμὸν γλυκὺν τὸν στρογγύλον καὶ εὐμεγέθη, saporem dulcem
rotundum amplumque dicit, vel cum magnitudine, ad innu-
endam diffusionem, referente *Theophrast.* *Eresio* l. 6. de *Caus.*
Plantar. c. 2. Addictus hujus Philosophiæ principiis *Lucre-*
tius idem confirmat l. 2. de *rer. nat.* vers. 398. seq. canens:

— — — mellis lactisque liquores
Jucundo sensu linguæ trahantur in ore,
Ut facile agnoscas, è lavibus atque rotundis
Esse ea, quæ sensus jucundè tangere possunt.

Huic ferè sententiæ suam quoque superstruxere sub-
tilissimus *Cartesius*, eumque sequentes, quos inter *Craani-*
us, *Hamelius*, *Bræckhuysen*, alique numerandi, particulas
dulcium nullâ figurarum asperitate, nec pertinaci irregu-
laritate, sed flexibilitate & mollitie constare affirmantes.
Ipseque *Willisius* lib. de *Anim. Brut.* c. 12. de *gust.* p. m. 79. parti-
culas in molles aculeos figuratas laudat. Confer, si lubet,
ren Rhyne Meditat. in Hippocrat. lib. de Vet. Med. p. 183.

Qui elementari Philosophiæ litant, & Medici & Phi-
losophi, calido & humido inter se probè proportionatis
dulcedinem adscribunt. Primum inter eos locum tenet
Hippocrates, qui cum de dulcedine aquarum pluviarum
differuisset, solis urentis & coquentis, seu sublimantis po-
tius, activitati eam assignans addit : *γίνεσθαι δὲ καὶ ἄλ-*
λα πάντα τὰ ἐψόμενα αἷν γλυκέα, sunt autem & omnia alia,
quæ coquuntur, dulcia, l. de *Aër. Aq. & Loc.* c. 18. t. 5. Collactea
hisce tradit *Pergamenus*, dulcedinem à moderato calore, tum
proprio, tum asciticio fieri asserens l. 4. de *simpl. med. fac.* c.
11. cum quo consentit *Philosophus* l. 2. de *Plant.* c. 10. Et
Alexand. Aphrodisæus l. 3. *Problem.* *γίνεσθαι τὴν*, inquit, *ἐν θερμό-*
τητι πλείονα καὶ ὑγρότητι, sit verò caloris copiâ & humo-
ris, Occasionem hisce sine dubio dedere fructus varii gene-
ris,

ris, ut ficus, uvæ, pyra, poma, &c. quæ crûda, acida, ingrata, cocta & matura dulcore grata evadunt.

Hæc ut benè habent, ita non sufficere tamen videntur ad satiandum animum sciendi avidum. Quare quod singula præstare nesciunt, juncta forsân felicius exequentur, adeoque non neglectis illis, sed retentis, licebit nobis ex principiis chemicis hæc illustrare. Enimverò si quæramus, quænam sint illæ particulæ rotundæ, æquabiles, læves, re usæ, quis item calor ille digerens, demulcens, non vitio verti poterit, si eas monstremus in sulphure, sale & mercurio.

Concedi nobis postulamus, illud esse principium saporum omnium, quod & per se solutum eminenter & principaliter eisdem offert, & aliis sociatum eorundem solutioni velificatur, eademque ut varia sapida sistit, sicque sal primum esse sapidum, omniumque saporum radicem. Sal vocamus, tanquam magis obvium & radicale principium, quod *πρωτος* & primario afficit linguam, quatenus & habet in se illas figuras, & centraliter quidem, & quatenus est solubile. Prout autem id ipsum à sulphure, caloris & ignis mincrâ, modificatur, & variè miscetur, solvitur ac obtunditur, ita & diversas exoriri figuras, & consequenter diversos quoque inde prodire sapores, necessum est.

Sique nomen offendat, sulphur vocamus, quia specialius & prescius dicit, quid sit, quam particulas ramosas, quales etiam salia fluida mentiuntur; quia in concreto concinnius effertur, sic & noscitur materiale hoc principium; quia item sic conformiter loquimur principiis & authoribus chemicis, aut potius ipsi rei. Partes verò mercuriales elasticas spirituosas itidem in sulphuris gremio latere, & mediante fermentatione evolvi posse è dulcibus, in aprico est, & non facilè à quoquam negandum. Adeoque dulcia ex sale acido & sulphure æquabiliter mixtis constare, ratione & experientiâ inducti asserimus. Sequimur in hoc, ut & reliquis, Excell. D. *Præsident*, qui in *Physiol. Reform.* c. 10. & 11, pluribus de eo legi potest.

Hinc

Hinc sanè mirandum, si paulò accuratius phænomena hæc porrò illustrantia perlustremus, dulcedinem ex acido & sulphure roscido inter se combinatis oriri, denominationem faciendo ab eo, quod eminet, quod dulcia ad oculum sistunt. Necessum enim est, rotunditatem illam particularem aut ab externo aut interno aliquo principio oboriri. Prius minus obvium est, vel credi potest, alterum potius testatur sensus. Jam verò sulphur est tale, læve, rotundum, plicatile, quod obtundit acidum, quod edulcat idem, quod obvium est miculis resinosis, & inprimis analysi, vel *συνγείσσει & διαγείσσει* chemicâ ad oculum demonstrabile.

Sic in regno vegetabili omnia dulcia hæc exhibent duo præcipua. Videmus enim speciatim ex saccharo, melle, mannâ, aliisque ad oculum demonstrari ac fundi spiritum acidum corrosivum, ac oleum, modò excutiantur trixæ sulphuris spumescantis, quæ intimius secum gerunt & ligant hæc talia, ut sal liberari & fluorem adipisci queat. Experimento facto eadem *ἐγχειρησις* succedit in radice glycyrrhizæ & polypodii; particulis scilicet sulphureis separatis & depressis acor & amarities in promptu est; ille debitus sali centrali acido, unde spiritus glycyrrhizæ æquipollet spiritui tartari; hæc alcalico, in sulphuris gremio recondito. Unde reverà ubi mel, ibi fel, ibi acor demonstrari potest. In singulis illis, ut & omnibus dulcibus est sulphur roscidum, blandum, oleosum, spirituosum, inflammabile; Inest & acidum, aut à rotundis sulphuris particulis obtusum, quæ hinc si expandantur, à spiculis salinis quasi simul animatæ dulcedinem præ se ferunt.

Exemplo sit porrò præter alia, saccharum saturni, ex acido & sulphure, aceto destillato & minio constans. Postquā nimirum sulphur saturni per calcinationem aptatum fuit, ut poris suis admittat acetum, in eoque solvi queat, in momento adest dulcedo, quæ cum saccharo vel melle certare possit. Tantum verò sulphuris cum acido est connubium, ut si postmodum destilletur saccharum saturni per

se, spiritus inde habeatur inflammabilis, instar spiritus vini, ob particulas spirituosas, prius sub acidi jugo depressas & inversas, laxatis & depressis vinculis resuscitatas.

Parili modo id elucet in vitriolo ipso, quod cum acrimoniâ dulcedinem præ se fert, tum nativo, tum arte facto, quando liquores acidi, succus citri, cydoniorum, pomorum, acetum, spiritus acidi, salis, vitrioli, aqua fortis, &c. limaturæ martis, tanquam sulphure terreo apprimè foeti, affunduntur, immutatis sic ac obtusis particulis acidis, & cum terreo sulphureis intimè combinatis. Hinc dulcia vel saccharata nil nisi salia acida esse, in aliis particulis coagulata, *Beckius in Experiment. & Meditat. circa Rer. natur. princip. p. 42.* pronunciat. Sic prægustato vitriolo fumum tabaci ore haustum mellis instar dulcescere testatur *Willisius l. c.* Rationem addit, quia spicula salina vitrioli particulis sulphureis, ex nicotianâ exhalantibus, fuere commixta.

Idem confirmat *Sponius Aphorism. Nov. Hippocr. sect. 4. Aph. 36. p. m. 238.* dulcedinem nempe, v. g. in vino, à sulphure prædominante derivans, ligatis sic ac repressis salinis particulis. *Hamelius lib. de Corp. Affect. c. 8. p. 191. seq.* dulcedinem potissimum è spiritibus ad maturitatem proVectis fieri statuit, partim salinis, partim sulphureis, partim mixtis. Egregiè *Willisius* & saporum diversitates modò à sulphure, modò sale provenire ait *lib. de Fermentat. p. m. 5. & 6.* Ubi autem sulphur, ibi ignis, ibi calor, & contra ea, ubi acidum, ibi frigus; ex horum intimiori connubio fit mixtum quoddam atque temperatum, calor fit blandus, moderatus; unde dulcedinem non excessui caloris vel siccitatis, sed mediæ temperiei ac temperatæ esse propriam communiter asseritur.

Hæc ipsa verò omnia ut benè habent, ita nondum exhaustiunt omnem dulcium rationem. Agnovit id rectè *Laurentius Gryllus l. de dulci & amaro non uno loco, & speciatiim l. i. c. 5. p. 34. f.* ubi, cum dixisset, calorem non facere

cere dulcedinem per se, sed fortuitò & juvando, habentem rationem causæ sine quâ non, primordium & seminarium dulcedinis per materiam sparsum statuit. Optimè nimirum formæ quoque principium, semen & fermentum specificum ac modificans, jungendum est.

Liceat huc referre quoque affectiones aliquot dulcium, quæ tanquam phænomena eadem signant, & ad reliqua illustranda inservire possunt magis. Sic (1) habent secum eminenter dulcia quandam *γλιχρότητα* & *viscedinem*, quod in melle, saccharo, saltim resolutò, mannâ maximè occurrit, ita quidem ut inspissata magis trahi & tenuari velut in fila queant, ob intimiorem particularum sulphurearum nexum & cohæSIONem.

Ob eandem verò rationem etiam (2) ad ignem posita, sine accessione quidem aqueorum diluentium, vel salinorum resolventium, *spumescent* maximè, & in infinitas bullulas confurgunt; non secus ac idem quoque præstant olea bituminosa & quasi talia, ut oleum olivarum, & alia pingua. Est hoc indicium manifestum, implicatas sibi invicem esse intimè & calori subdito æqualiter reniti, ægriusque *διάκρυσιν* pati illa vincula, adeoque sulphureas sustinere illam provinciam, si non mole, tamen virtute præponderante, uti sulphur maximè est & activum & diffusivum sui.

Hinc & (3) non sunt *destillabilia*, per se scilicet, & sibi relicta, non discontinuata intimius, quod obsistant propulsanti igni, quantum possunt. Experiri id facile licet, si mel vel mannam è cucurbitâ destillare quis velit, frustra enim id tentabitur, non nisi exiguâ quantitate phlegmatis ascendente, cum infinitis bullulis, vel supergressu, si urgeas opus, materiæ. Sed si debilitentur & extra se ponantur, seu terreis, seu salinis, vel utrisque potius, id impetratur sine difficultate ullâ. Adde

(4.) Quod eadem hinc consequenter non destillent, vel super alembicum mittant *suam dulcedinem*. Vt non amaræ,

ita nec dulces dantur aquæ, sed, texturâ integrâ relictâ, dulcedo omnis in fundo manet, argumento non tam fixitatis, quàm evehi aptas particulas, tenaculis istis immerfas, eluctari non posse, sed detineri firmitus.

(5.) Quod si verò obtineatur per additamenta, vel naturâ jam præsentia, destillatio, loco dulcedinis prioris alia emergunt quasi nova entia, *acidum* fluorem indeptum, excusso sulphuris illo jugo, & *amaricans* oleum, (quod jam innuimus,) inflammabile & empyreumaticum. Hæc verò non tam produxit ignis, ut sibi persuadent nonnulli, quam in aprium dimisit, neque immutatio inde accedit, præterquam accidentalis.

Cæterum non minus (6.) *fermentationem* facile subeunt & *producunt*, seu promptè fermentescunt, tum per se, accedente humiditate, tum quando in gremium eorundem committuntur alia quoad substantiam heterogenea, exemplo electuariorum officinalium, linctuum, siruporum, & aliorum, cum primis velificante ambientis calore. Immutant sic alia, & immutantur insimul ipsamet, ut hoc ipso pacto aliam longè faciem induant, aliosque effectus edant. Occulunt enim in se & in sinu gerunt fermentationis materiam, & quæ ad hanc requiruntur, quo de alibi latius agitur.

Seorsim verò (7) *spiritus vinosos largiuntur*, beneficio fermentationis viâ humidâ tractata, æqualiter sic attenuatis per motum intestinum promotum particulis sulphureis, & subtilisatis, ut viscedine excussâ cum aquâ substantificè maritentur, eamque ardentem reddant. Testantur id non solum uvæ recentes expressæ in mustum, ipsæque passulæ, sed & mel ac saccharum. Unâque sic iterum, quamvis aliâ methodo, tum vinum, tum spiritum vinosum, tum acetum fundunt.

Sic & observatum fuit (8.) *additum lacti mel saccharum. ve butyri separationem & coagulationem per conque-*
sationem consuetam remorari ac prohibere; quandoqui-
dem

dem illigant inter se magis partes ferofas & butyrofaf cum
cafeofis, ut coëant potius fic, quàm divellantur. Uti enim
fal quoque eft interpres amicitia inter aquam & fulphur,
ita & hoc loco id fe exerit.

Tacemus (9) alia huc referenda quoque, uti ex melle
& pane fecalino fieri formicas, experimento *Helmontii* &
vulgi; dulcia effe insectorum illecebras, grataque fic cu-
licibus & muscis, quæ hisce inhiant, & promptè advolant,
unàque facillimè & perlubenter sua seminia iisdem asper-
gunt; dulcia effe vel reddi facilè nauseabunda, quod &
Tullio notatum; mel cum butyro commodè, & gratâ tem-
perie saporis, panis v. g. illitum simul sociari; balsamicâ
suâ vi condire & mumificare eadem sibi concredita, & similia.

CAPUT II.

De

DULCIUM USU.

QUod de aliis, id primo loco etiam de dulcibus enun-
ciat *Hippocrates*: & τὴν αὐτὴν δύναμιν ἔχουσι, non eandem
virtutem habent, l. 2. de diet. c. 7. r. 5. Quædam enim
communia sunt iisdem inter se invicem, quædam specifi-
ca, ob modi mixtionis, texturæ, & virium seminalium di-
versitatem, & aliorum elementorum vota, adeò ut etiam
contrarias operationes videantur edere quædam.

Ut itaque vires hæc ordine visamus, (1.) *Dulcia*, cum
acidis, amaris, acribus comparata, temperata sunt, ut jam
innuimus, à sulphure cum aquâ probè coalito & commen-
surato, nec salino principio prædominante. Valet id de
alimentosis, minus eminente dulcedine, lacte, passulis, fi-
cubus, oleo & pluribus recensitis. Eminentiora verò ad prin-
cipia corporis vitalia relata calefaciunt, elogio *Hippocratis*
l. 2. de diet. c. 33. r. 1. τὰ γλυκέα θερμαίνειν πείθουκε. *Dulcia ca-
lescere solent*, tum solida, tum fluida. Ex eodem miscelæ
aquea.

aquearum & sulphurearum particularum fundamento *humectant* eadem. Τὰ λιπαρά, καὶ τὰ πύονα, καὶ τὰ γλυκερά ὑγρασίαν καὶ φλέγμα παρέχει. *Pingua & dulcia humiditatem & pituitam exhibent*, ob lentorem, quem habent secum plurimum. In quibus verò sulphur magis digestum est & eminens, terreis inprimis moleculis intercedentibus, alio effectu conspicua redduntur, & *siccant* potius, exemplo mellis & sacchari.

Ab his primis qualitatibus digressi, vires obtinere videmus etiam in secundis positas. Enimverò (2.) *Dulcia emolliunt, laxant & lubricant*, ob mucilaginem, quam concretam secum gestant, tum exterius, tum interius applicata. Hinc γλιχρότης suâ emplastica, blandoque calore aptissima sunt ad dilatandos poros fibrillarum, emolliendos tumores, maturandos rumpendosque abscessus & digerendos, exemplo caricarum per se impositarum, & in decoctis, gargarismatibus, & aliis modis adhibitarum, cataplasmatis item ex melle & farina, & aliorum. Hinc & *alvum movent*, quo loco seorsim pulpa cassiæ, manna, pasulæ min. & maj. exacinatae, profunt, ut & sirupi varii generis, v. g. de cichor. cum rhabarb. rosar. solut. de senâ, soli sæpè obstructions tollentes, quatenus fermentationem humorum promovent. Hinc & clysteribus ac purgantibus aliis adduntur. Confer. *Cous l. 2. de diat. c. 36. l. 23.*

Laudari meretur (3.) virtus *abstergendæ*, quâ gaudent quoque; siquidem particulas mobiles reddunt, & partim demulcent, partim salinarum miscelâ extricant & leniter stimulant. Hinc, præter usum internum, idem emicat in ulceribus & vulneribus variis. Mel rosatum laudatissimum in vulneribus capitis, oculorum, & aliis, ubi unguenta digestiva non habent locum. Saccharum respersum partibus recens vulneratis condit & consolidationem juvat; additur collyriis utrumque non incongruè, ut & clysteribus, ulceribus sinuosis, gargarismatibus. Imò referri huc potest

potest usus in atrophîâ infantum, cum tumore & hydrope ipso, expectandus quidem ab humectantibus solum simul & temperatioribus, quales sunt passulæ. Hinc *Pergamenus l. 8. de compos. Med. sec. loc. c. 7.* hepati totâ substantiâ familiares esse scribit; saccharata verò & mellita non item. Ratio in promptu est, humectant quippe eximiè, bilemque sic inertem corrigunt & abstergunt, & glandulas intestinales suaviter demulcent. Vid. hanc in rem *Riverius in Instit. med. l. 4. c. 15.* & in *Praxi*, qui pulpam seu rob passularum eo casu dilaudat.

Eodem titulo (4.) *resolventibus & demulcentibus* adnumerari merentur, quæ quidem sub tenaculis suis sulphureis salinum junctum habent characterem, inter utraque quasi media. Dum enim abstergunt pituitam, & crassitiem seu lentorem ejusdem corrigunt, *σάρον* expediunt quoque, suo modo tamen, neque parietes præterquam blandè afficiunt. Sicuti enim abstergentium subeunt vicem, sensu teste, exterius, & mundificant, ita interiori actuata idem præstare non abludit. Hinc & diureticis adnumerantur non pauca, utpote renibus & vesicâ iisdem indicatis gaudentibus, quem in finem *Dioscorides l. 2. c. 104.* saccharum aquâ dilutum commendat. Confer. *Hippocr. de affect. c. 50. t. 1.*

His sic præmissis provehi possumus, & ulterius de viribus eorundem judicare. Enimverò (5.) decantatus dulcium *usus* est *nutriens*, sive ipsas particulas nutritiles in corpore respiciamus, sive in dulcibus reperiundas. Quis, quæso, nescit vetus licet, ast verissimum, illud Scholarum porisma: nutritonem fieri per similia? Vel istud: iisdem nos nutriri, ex quibus constamus; constamus autem sanguine & sero, hinc iisdem quoque nutritionem fieri sequitur. Sanguinem autem & serum dulciâ esse non dubium est, modò considerentur in statu naturali, sano, sibi relicta. Confirmat id *Divinus noster Senex*, quando *l. de Vet. Med. c. 24. t. 29.* s. inquit: ἐνὶ γὰρ ἀνδράσω καὶ πικρὸν, καὶ αἰλμυρὸν, καὶ γλυκὺ, καὶ ὄξυ, καὶ στυφινόν, καὶ πλάδαρόν, καὶ

C

ἄλλα

ἀλλὰ μυρία. Inest enim in homine & amarum, & salsum & dulce, & acidum, & acerbum, & fluidum, & alia infinita; quod de sanguine & sero omnino quoque valet.

Quod itaque de fœtu in utero scribit l. de Nat. Puer. c. 40. τ. 4. ἔλκει δὲ τὸ αἷμα] & ἐς ἑωυτὸ τὸ γλυκύτερον, trahit ad sese, quod dulcissimum est in sanguine, id etiam in genere valet de alimento; imò reliquæ qualitates sub hanc quasi coeunt & subordinantur. Accedit fermentatio five immutatio in singulis culinis, hujus dulcificationis quasi apparitor, calore & motu se exhibens; ab his autem dependet mixtio, à mixtione temperies, à temperie tandem dulcificatio; non aliter ac uvæ, aliique fructus & immaturi succi cruditate austeri vel acidi, à radiis solaribus dulcorem impetrant.

Dulcibus igitur nos nutriri vel his jam inductis statuere licet, quod ipsum ferè in regulam abiit Medicam & Philosophicam, elogio Philosophi l. de Sens. & Sensil. c. 4. πᾶν τὰ τρέφεται τὸ γλυκεῖ, ἢ απλῶς, ἢ μεμιγμένως, omnia dulci aluntur, vel simplici, vel composito. Confirmat idem in Problem. sect. 21. Dulcia pinguia & opima nobis gustu suavissima, eademque omnia valide nutriunt. Juxta Galenum l. 4. de simpl. Med. Facult. c. 10. πᾶν τὸ τρέφον ἐκ τῷ γένους ἐστὶ τῶν γλυκέων, omne nutriens ex dulcium genere est. Et l. de Oculis c. 1. omne alimentum dulce est vel unctuosum, vel compositum ex utroque. Secundum Cōm lib. 2. de diet. c. 33. τ. 19. τὰ γλυκέα, καὶ τὰ πύονα, καὶ τὰ λιπαρὰ πλεονεκτήματα ἐστὶ. Dulcia & pinguia ac oleosa replent, i. e. nutriunt corpus, nutritio enim est repletio absumti. Confirmat idem Plinius, qui dulcibus augescere corpora scribit. l. 11. c. 54.

Non omnia verò dulcia nos alunt, aliàs etiam venena quædam nos nutrent, sed illa, quæ constant particulis substantificis, γλιχρῶς, apponi aptis, pinguibus, sulphureis, roscidis, blandis, uno verbo temperata, prius in corpore actuata, quod Cōm l. c. indigitare vult, quando ita pergit: διότι ἐξ ὀλίγων ὀγκων πολύχονα ἐστὶ θερμαινόμενα τε, καὶ

καὶ διαχεόμενα πληροῖ τὸ θερμὸν ἐν τῷ σώματι, καὶ γαληνιά-
ζειν ποιεῖ, quia ex modica mole multum diffunduntur; calefacta
autem & diffusa calidum in corpore replent & tranquillum esse fa-
ciunt.

Optimè hæc illustrari possunt ex principiis chemicis,
si sulphur & aquam, tanquam principium nutritionis ma-
teriæ ponamus; natura enim ex alimentis magis sibi seli-
git & applicat sulphur minus sal; vid. D. *Præses Theor. part.*
4. s. 2. §. 78. p. 147. & in Physiol. Ref. c. 8. nec non alibi. Mul-
tum ergò interest, quomodo se habeant temperamenta
& principia vitalia. Quibus enim succi vitales obtigere be-
nigniores, suaviores, dulcibus particulis fœti, illos opti-
mè nutriri, imò ex hoc argumento solo pinguescere certum
est; quibus verò falsi, acres, acidi, nunquam pinguescunt,
etiā si victu utantur plenissimo, ut verba laudemus *Ejus-*
dem è Physiol. Ref. l. c. Maximum hinc in humorum nutri-
bilitum dulcificatione situm est momentum; si enim sint
acidi, falsi, &c. non ita facilè poris partium inhærere & ag-
glutinari possunt, sed acre suo & acrimoniâ carnes depa-
cunt, hincque atrophiam, aliæque mala inducunt; nam,
teste Hippocrate *l. de Aliment. c. 2. t. 1. Facultas alimenti perve-*
nit ad ossa usque, & ad omnes partes.

Inter πολύτροφα hæc recensendi & cibi & potus, amy-
gdala dulcia, passulæ, lac, cerevisiæ dulces, præ amaris nu-
trienti virtute pollentes, in primis triticea, de quibus *Job.*
Heinr. Meibomii Tract. de Cerevis. & Ebriamin. potulent. ele-
gantissimus consuli potest. Præ aliis verò vinum hac facul-
tate pollet, & hoc nomine lac senum dictum. Idem de mel-
le & saccharo valet, modò non excedatur, è quibus & vinū
parari potest, egregio experimento *Beccheri in Phys. subterr.*
l. 1. s. 5. c. 2. p. 378. cujus vires etiā in Psychosoph. p. 24. maximè
deprædicat. Quod de vino dictum, item valet & de mulsâ,
constat enim ex melle & aquâ coctis & fermentatis. De vi-
no dulci & mulsâ egregius extat locus apud *Coum l. de vict.*
acut. c. 25. & 26. Fusius de hoc legi potest Sebitius l. de Ali-

ment. facult. c. ii. p. 468. Hinc non audiendi, dulcia alere negantes, quos inter *Laur. Gryllus l. i. de sapore dulci & amaro* 6. 2. Restat, ut hæc concludamus, dulcia, temperie æquali gaudentia, esse alimentosa, reliqua alimentum medicamentosum magis.

(6.) *Ufus*, huic ferè affinis, est *analepticus, confortans ac roborans*. Sic nutriunt & analeptica sunt laudata amygdala dulcia, passulæ, pineæ, pistacia, juscula avenacea, vinum Hispanicum, Creticum, &c. Hinc temperatio-
ra in hæcticâ, phthisi, atrophîâ, tabe, & ubi vires substantificæ defunt ac restaurandæ sunt proficua, alia aliis casibus. Pertinent enim eadem ad victum plenum, & ad abortum præcavendum, fœtumq; roborandû apprimè faciunt. Ex medicamentosis præ aliis frequentantur potiones, emulsiones, julepi, sirupi, gelatinæ; quo fine toto die præscribuntur in virium v. g. debilitate, saltim condimentorum loco. Idem valet de conditis, confectis, rotulis, morsulis, aliisque cum saccharo paratis, siquidem tenerâ mucilagine, eâque gratâ, sigillata sunt, ideòque palato abblandiuntur, modò cum grano salis id accipiatur, & cætera respondeant. Unde referri huc potest illud *Hippocratis*, quod aliàs de alimentis deprædicat 2. *Aphor. 38.* paulò deterioribus & potus, verùm jucundior, melioribus quidem, sed injucundioribus est præferendus.

Sic porro inter *usus* ultiores (7.) eminet *pectoralis*, itidem præstantissimus. Dulcia pectori esse amica, noto notius est, secundùm illud:

Vult acidum stomachus, pulmo dulce, hepar amarum.

Sic speciatim omnis generis laudata medicamenta profunt; saccharum quoque tantum per se eo fine locum habet, & cum aliis remixtum; glycyrrhiza in substantiâ, & succus ejusdem inspissatus, successivè deglutienda, in affectibus faucium ac pulmonum. Tacemus mixta cum aliis, ut oxymel squilliticum, ideò in asthmate, pleuritide, tussi, verbo, ubi incidendum, resolvendum, abstergendum, lauda-

laudatissimum ; quod divinus *Senex l. de Vast. acut. c. 28. l. l.* dudum asseruit, quod sputum educat, & facilem faciat respirationem. Constat enim ex melle & aceto, distemperantibus se invicem, melle quidem aceti acrimoniam, hoc verò illius viscositatem. Mel autem præcipuum quoque pectorale est, egregiè enim abstergit, roborat totum corpus; serosioribus tamen magis & frigidis, quàm calidis & siccis proficuum, quia in his bilem auget, & lympham reddit spissiore, de quo eleganter *Galenus l. 4. de simpl. Med. Fac. c. 17. p. m. 58.*

Videas hinc in hisce affectibus, præcipuè tussi ac raudine, passim ista commendata, sub pulverum, conservarum, linctuum, rotularum, morsulorum, conditorum, confectorum, siruporum, potionum, infusorum, decoctorum, electuariorum, &c. pectoralium formâ, quatenus asperitatem parietum fibrillaceorum laxigant, lympham è glandulis exudantem, coagulatam, falsam, acrem temperant, abstergunt, & lubricando partim in motum cient, ac expectorationi aptant; partim ad alvum divertunt. Ast maxime & hîc cavendum, ne quid nimis; facile enim ventriculus lædi potest, sive continuâ quantitate, sive discretâ largius adhibeantur. Nos equidem non latet, plurimos ejusmodi dulcium, v. g. saccharatorum atque mellitorum usum rejicere, inprimis in affectibus pectoris quoque, quos inter *Helmontius, libr. Pharmacopol. & dispensat. modern. inscripto, p. m. 371. §. 29. seq.* Medicos increpans, quod omnia saccharo æquè ac melle larvent & condiant; ast rationes allatæ non eadem planè excludunt. Idem statuit *Sylvius l. 1. Prax. c. 34. §. 100. Benedictus in Theatr. Tabid.* aliique huc referendi. Interim istis reponimus *B. Rolsincii nostri verba, ex Ord. & Method. Med. spec. l. 14. f. v. c. 21. p. 991.* petita; Limosum, ait, qui credunt reddere sanguinem, idque probant eclegmatum ac rotularum pectoralium effectu in tussi, confundunt τὸ κατ' ἐαυτὸν, & τὸ κατὰ συνβιβη-
τος, scopæ pulverem excitant, movendo eum, qui aderat, non producendo novum.

22
Neque prætereundus (8.) *usus aphrodisiacus*. Vti enim sine Cerere & Baccho friget Venus; ita dulcibus non parum juvatur, quod & plurimum substantifici γλιχῆς corpori fœnerent, & sero ὀργασμόν. Hinc succolada Indæ, amygdala dulcia, ova forbilia, vina, aliaque ex superioribus huc referenda; & speciatim mel, quod hinc & solum comestum in dispositis pollutiones nocturnas excitare solet observatum est.

(9.) Non ultimum denique obtinent usum, quod *gratiam largiantur dulcia plurimis*, tam alimentis, quam medicamentis; unde varia consurgunt bellaria. Sic condiunt & corrigunt suâ gratiâ amara, acida, acria, insipida & alia. Τῶν πικρῶν καὶ δριμέων τοῖσι γλυκοῖσι διακρινῶντα, vim amarorum & acriorum dulcium mixturâ corrigere oportet, teste Coo, l. 2. de diat. c. 31. t. 16. Item gratiam largiuntur purgantibus, quod morsulorum, aliorumque jam laudatorum exemplo probari potest. Gratiam porro fœnerant anthelminticis, ut blanditiis illorum inescati lumbrici promptius hauriant internecionem illis struens remedium.

CAPUT III.

De

DULCIUM ABUSU.

Contraria juxta se posita magis elucescere, frequens est in scholis axioma. Neque omnia omnibus conveniunt, sed huic mel, alteri fel, uni prodesse, alteri nocere videas. Imò nihil est tam jucundum, tam perfectum, quod non suos quoque patiatur manes. Cum itaque hæcenus de usu dulcium abundè dictum, paucis etiam eorum ABUSUS restat investigandus, & quibus noceant. Valet enim de his effatum Hippocraticum l. 3. de Morb. c. 29. t. 10. ὅτι τὰ γλυκῆα πᾶσι ἐνυμφεῖται, neque enim dulcia omnibus prosunt. Et

Et (1.) quidem assertum contrà eadem est notissimum,
dulcia facillè bilescere, de quo *Poëta Venusinus lib. 2. Serm. Sat.*
 2. sic canit:

————— at simul affis
Miscueris elixa, simul conchyliis turdis:
Dulcia se in bilem vertent, stomachoque tumultum
Lenta feret pituita.

Effectus hic non tantum exinde colligi potest, quod dulcia reddi soleant facillè amara, texturâ inversâ, extra corpus; sed & assumpta observantur idem præstare. Et hinc dulcia nociva asseruntur *hepati*, sicque billosis, quatenus ob particulas viscidas, oleosas, sulphureas facillè obstructions pariunt, & bilem augment; puta, si nullus eorum habeatur selectus, si iisdem excedatur, si dentur absque humectantibus, si subjecta non distinguantur. Observatum hinc est non semel, à dulcium mellitorum cumprimis largiori usu febres exortas.

Alterum vitium à dulcibus facillè eveniens dicto affine est, quod (2.) sint *fermentifica*. Ut extra corpus facillè fermentescunt, ita & in corpore, tum in primis viis, tum in massâ sanguineâ quoque. Inflant præcordia & anxietates pariunt, ad vomitum, choleram, alvi fluxus invitant. Extat de hoc elegans locus apud *Hippocratem l. de intern. affect. c. 45. t. 5. seq.* τὸ μέλι, inquit, τὸ ἐφθὸν καυμάλῳδες ἐστὶ, καὶ προσπλάσσει τῇ κοιλίῃ, ἐπιπτα ὁπόταν κατεψηθῇ ἐν τῇ κοιλίῃ, ἀναξέειναι, καὶ ἐξαπίνης ἢ γαστρὸς ἀείρειναι, ἢ πύλῳ πρᾶναι, καὶ δοκέει διαρρήσκειν. *Mel coctum estuosum est, & ventri adhæret: postea cum concoctum fuerit, in ventre effervesceat, & venter de repente attollitur, & ardet, & dirumpi videtur.* Hinc *Sylvio* dulcia videntur non tam augere, quam turbare, atque ad vitiosè effervesendum excitare & cogere bilem, *l. i. Prax. c. 44. p. m. 298.* sed res eodem redit, utrumque præstant dulcia.

Hinc & *lien* morbo dulcia omnia inimica pronunciat *Celsus l. 4. c. 9. & Medicinæ Parens* non uno loco id confirmat,

firmat, v. g. *l. de Viâ. Aut. c. 25. t. 3. & l. de intern. Affe. c. 33. r. 26.* Celebris hanc in rem est parœmia sapientissimi Pythagoræ, τοῖς σπληνικοῖς τὰ μὲν δριμέα καὶ πικρὰ ὠφέλιμα, τὰ τὲ γλυκέα βλάπτεραι, *splanicis etiam pira et amara proficua, dulcia nociva professi.* Vid. *Hurnius Method. ad Prax. l. 2. c. 10. p. 141.* Hinc scorbuticis eadem interdicit *Beckius in Exper. Rer. Nat. l. c.* non quod saccharum lieni sit inimicum, sed quod aciditate suâ vitiosas excitet effervescentias, undè viscerum tumores, &c.

(3.) Dulcia acidi sunt facta, seu acescunt faciliè, depressis particulis reliquis in laboratorio vitali, exaltatis & fluorem, sicque prædominium, nactis acidis. Habent enim eas quoque in se, quæ ruptæ reliquis in corpore & adaugentur faciliè, & fermentatione evolvuntur. Exerit se ille acor itidem nonnunquam maturius, circa primas vias, in stimulo illo, quo diarrhœas, ructus, vomitus citant, frequentius verò in ipsis undis vitalibus, effectibus satis conspicuis.

Sic & (4.) *Obstructionum fabri* sunt, latiori acceptione vocis; spissum enim, magis lentum & lutosum, cœnosumque reddunt sanguinem & lympham, ut per poros minus perreptare queant, sed stagnent faciliè, pituitam, mucum, lentorem concipiant in tubulis, & hinc omnis generis morbos inferant, maxime tartareos, icterum, calculum, colicam. Hinc passim in ejusmodi morbis *Cous* à dulcibus abstinere præcipit, quales sunt cachexia, hydrops, affectus hypochondriacus, & ali.

Enimverò eo ipso nomine porrò (5.) & *scorbutum gignunt* largius assumta dulcia, & promovent, per dicta. Sanè hinc locis mari Balthico vicinis & aliis endemius non uno titulo est scorbutus, inprimis verò & ob dulcium hunc excessum, dum impensius saccharatis delectantur. Quando enim & acidum gignunt faciliè, & tartareas obstructions fovent, non parùm huc conferre queunt.

Minus itaque audiendus videtur *Beccherus*, qui in

Phys. subterr. l. 1. f. 5. c. 1. p. 319. saccharum præfert salis, & refert, Indos, dum loco salis utantur saccharo, hac ratione nunquam scorbuto laborare, ideò Europæos pro stultis habentes, quod tam acerbam materiam intra corpus fumant. Sed minus idem Europæis convenit, ubi calor tantus non est, & sacchari ac dulcium excessus facilè putrilaginem scorbuticam adauget, quamvis & idem de falsis eodem reatu verum sit. Conf. *Mællenbroccius de Arthrit. vag. scorbut. p. 93.* *Dorncrellius in præfat. Dispensat. Mæbius l. 4. Institut. part. 2. c. 3.* & alii plures.

Referendum huc est vulgatum diverbium: quod dulcia, inprimis saccharata, dentes denigrent, mobilesque reddant, ob acidum & lentorem, quem in sinu suo foveant, & partim immediatè affricant, unde ab illorum usu os aquâ frigidâ colluere præstat; partim mediante salivâ illuc accumulans, qualis enim lymphæ, quam talem reddunt, talis saliva.

Non minus etiam ex dictis rationibus (6.) utero incongrua sunt. Ut enim ad menses citandos dulcibus aliquid tribuant nonnulli, ad fermentationem debitam & ὀργασμὸν sanguinis promovendum; id tamen cum grano salis est intelligendum. Si enim excefferis, illa potius noxia fuerint. Sic & ubi reficiendi spiritus, fœtus roborandus, suum usum habent, & nota est Practicorum regula, dulcibus uterum demulceri. Hæc omnia sunt verissima, & nihilominus hysterics sunt adversa, utpote cacochymicis, hypochondriacis, acidis, biliosis, fermentificis humoribus ac halitibus fœtis, unde facilè quieti prius fluctus turbas acquirunt, & paroxysmos citant, in aliis tamen magis in aliis minus id observatur.

Idem verò & de aliis paroxysmantibus morbis valet, nominatim epilepsiâ & motibus convulsivis, qui à dulcibus facilè exasperantur & excitantur. Adeoque dulcia in febribus, alvi fluxibus & torminibus, item capite dolentibus non habent locum, quatenus effervescentiam indu-

D

cunt

cunt majorem, humoresque magis turbant. Quod dulcia & suaveolentia suffocationem uteri inducant, vid. *B. Job. Theod. Schenckius syntagm. de Comp. Med. p. 141. & 122.*

Minus quoque favent (7) dulcia *ventriculo* ipsi, sæpè palato magis grata, quàm culinis reliquis: idque tum alias ob causas, tum ob temperiem calidiorē, & inprimis viscedinem, unde restitant facillè, cardialgiam vel dolores gravativos saltim causant, & pituitam accumulānt. Licet ergò eadem non abhorreat stomachus, optimè siquidem nutriunt; attamen si excedatur, si iisdem tanquam victu pleno uti velimus, non solum læsio ejusdem cum appetitu prostrato, verum etiam varia inde symptomata certo certius metuenda, v. g. scabies & alia. Hinc & ad pediculos ipsos generandos non parum conferunt, ob nutrimentum superfluum & excrementitium. Tale exemplum recenset *Heerius Obs. 23.* à nimio nempe ficuum atque caricarum usu pediculos esse generatos. Conf. *Sim. Pauli quadripart. Class. 3. p. 299.*

Denique (8.) *Dulcia facillè verminescunt.* Sunt quidem, qui statuunt contrarium; & dulcia potius esse anthelmintica rentur, quos inter numerandus *Scipio Mercurius*, qui *l. de Obstetric. p. 819.* experiētiā id evincere conatur, mox rationem addens, quod dulcia non solum laxent alvum, sed & vermes educant, dulcibus nimirum ad nauseam usque & crepaturam saturatis moriendum & exeundum esse: suspectum tamen ipse fatetur tandem hoc remedium. Alii dulcia, quā dulcia sunt, lumbricos non procreare statuunt, sed eos tantummodò, si affuerint, excitare, ut *Hier. Gabucinus Comment. de lumbric. c. 7. p. m. 78.* cum dulcia, quā talia, eo consistēt temperamento, ut facillè in quovis corpore in bilem vertantur, ex bile verò nullum nec intra, nec extra corpus procreari animal possit. Verum cum semina verminosa promptè suscipiant, & suscepta corpori inferant: cum nutrimentum gratum suggerant, posito temperamento calido & humido, multum
omni-

omninò conferunt ad verminationem. Conf. *Rolfincii Epit. Affect. particul. l. c. p. 321.* Et quomodo amaritudo mellis dulcedini succedat, vid. *Laur. Gryllus l. c. lib. c. 13.* Hinc præstat iisdem eo casu abstinere, & ad fallendos magis, quàm necandos vermes illis uti, ut suprà jam dictum, sub hoc melle promptius hauriendo fel five venenum.

Vt verò hæc concludamus, ad effectus ejusmodi præstandos non unus diversitas ætatis, temperamenti, coctionis, fermentorum, subjectorum, plurimum confert, ut in aliis verminefcant, in aliis acefcant, in aliis bilefcant magis, & sic porro, in se temperata & innoxia. Quare ut bellaria, ut condimenta locum potius habent, non in excessu, non ubi contraindicantia adsunt. Ut victus ipse non unus omnibus prodest, aliis plenus, aliis attenuans magis: ita idem valet de medicamentis. Hinc & electuaria, emulsiones, linctus, sirupi, tantum abest, ut eliminanda sint è foro medico, ut potius cum debitâ cautelâ administranda, modicè, decenter, & cum ratione.

Sufficiant hæc hâc vice. Quod si quid boni ac utilis, benevoloque ac erudito Lectori gratum, proposuimus, dulce nobis iudicium erit futurum; ubi verò acerbum vel acidum, spem facimus eidem ac nobis, cum pomis aliisque fructibus immaturis aut acerbis nostrum hunc laborem dulcedinem suo tempore secuturam majorem, ubi & ipse & iudicium magis maturum erit.

SOLI DEO GLORIA!



Clarissimo Dn. Doctorando

S. P. D.

P R Æ S E S.



Legans est sententia Pindarica : ἀεὶς
 εὐφροσύνην πόνων κεραιμένων ἰαλγός. *Optimus*
medicus letitiâ laborum judicatorum. Quis
 non lætetur, benè actæ rei memoriâ? Quis
 non gaudeat fortunato eventu, partâ gloriâ, debella-
 to morbo, restituto ægro? Nullus sanè labor post se
 gratiorem relinquit memoriâ, quàm felici corona-
 tus exitu. Non minus verò id valet de laboribus primis
 tyrocinii medici annis exantlatis, ut imbuatur animus
 omnigenâ doctrinâ, excolatur ingenium, & sufficiens
 apparatus hinc suppetat, quò suppetiæ ferri laboran-
 ti naturæ & desiderantibus cujuscunque sortis & con-
 ditionis valetudine affectis adversâ ex voto possint. Ju-
 dicati etiam Tui sunt labores egregii studiorum gra-
 tiâ per plures annos suscepti. Præstolantur eosdem
 jam præmia, non solùm honorum publicitus brevi
 conferendorum, sed & plura inde consecutura, quan-
 do paternis insistentes vestigiis felici praxi, novisque fa-
 mæ incrementis familiam ornare perges. Adspiret
 honoribus & insigni proposito huic supremum Numen,
 ac invidendis successibus ampliet jam partam
 familiæ Tuæ gloriâ! Dab. è museo
 M DC XCIV. Die VII. Maji.

F I N I S.